

BOSNA I HERCEGOVINA
FEDERACIJA BOSNE I HERCEGOVINE
VRHOVNI SUD
FEDERACIJE BOSNE I HERCEGOVINE
Broj: 07 0 K 019632 23 Kž 7
Sarajevo, 14.02.2024. godine

U IME FEDERACIJE BOSNE I HERCEGOVINE!

Vrhovni sud Federacije Bosne i Hercegovine u Sarajevu, u vijeću sastavljenom od sudija Begić Jasmine kao predsjednice vijeća, Dugonjić mr Božidarke i Muratović Hurije kao članova vijeća, uz sudjelovanje Šeta Mevlide kao zapisničarke, u krivičnom predmetu protiv optuženog M.G. zbog krivičnog djela Neovlaštena proizvodnja i stavljanje u promet opojnih droga iz člana 238. stav 2. Krivičnog zakona Federacije Bosne i Hercegovine u sticaju sa produženim krivičnim djelom Neovlaštena proizvodnja i stavljanje u promet opojnih droga iz člana 238. stav 1. u vezi čl. 31., 54. i 55. istog zakona, te zbog krivičnog djela Neovlašteno nabavljanje, držanje ili prodaja oružja ili bitnih dijelova za oružje iz člana 65. stav 1. tačka a) u vezi sa članom 6. Zakona o oružju i municiji Hercegovačko Neretvanskog kantona/županije, odlučujući o žalbi branitelja optuženog M.G., izjavljenoj protiv presude Kantonalnog/Županijskog suda u Mostaru broj 07 0 K 019632 23 K 2 od 16.05.2023. godine, u sjednici vijeća održanoj dana 14.02.2024. godine, u prisustvu federalne tužiteljice Vranjkovina Fikrete i branitelja optuženog M.G., advokata Beganović Adnana, a u odsutnosti uredno obaviještenog optuženog M.G., donio je

P R E S U D U

Uvažanjem žalbe branitelja optuženog M.G., preinačava se presuda Kantonalnog/Županijskog suda u Mostaru broj 07 0 K 019632 23 K 2 od 16.05.2023. godine u odluci o uračunavanju pritvora i ranije kazne, tako da se optuženom u kaznu zatvora izrečenu tom presudom, na osnovu člana 57. stav 1. Krivičnog zakona Federacije Bosne i Hercegovine uračunava vrijeme provedeno u pritvoru u periodu od 15.06.2021. godine do 23.12.2021. godine, vrijeme provedeno na izdržavanju kazne zatvora po presudi Kantonalnog/Županijskog suda u Mostaru broj 07 0 K 019632 21 K od 23.12.2021. godine u periodu od 22.02.2022. godine do 14.11.2022. godine i vrijeme provedeno na uvjetnom otpustu po rješenju Federalnog ministarstva pravde Sarajevo, Komisija za uvjetni otpust broj 01-12-5-2/22-275 od 30.08.2022. godine.

O b r a z l o ž e n j e

Presudom Kantonalnog/Županijskog suda u Mostaru broj 07 0 K 019632 23 K 2 od 16.05.2023. godine, nakon prihvatanja sporazuma o priznanju krivnje, optuženi M.G. je oglašen krivim zbog krivičnog djela Neovlaštena proizvodnja i stavljanje u promet

opojnih droga iz člana 238. stav 2. Krivičnog zakona Federacije Bosne i Hercegovine (KZ FBiH) u sticaju sa produženim krivičnim djelom Neovlaštena proizvodnja i stavljanje u promet opojnih droga iz člana 238. stav 1. u vezi čl. 31., 54. i 55. istog zakona, te zbog krivičnog djela Neovlašteno nabavljanje, držanje ili prodaja oružja ili bitnih dijelova za oružje iz člana 65. stav 1. tačka a) u vezi sa članom 6. Zakona o oružju i municiji Hercegovačko-neretvanskog kantona/županije i osuđen na jedinstvenu kaznu zatvora u trajanju od 1 (jedne) godine i 6 (šest) mjeseci, u koju mu je uračunato vrijeme provedeno u pritvoru u periodu od 15.06.2021. godine do 23.12.2021. godine i vrijeme provedeno na izdržavanju kazne zatvora po presudi Kantonalnog/Županijskog suda u Mostaru broj 07 0 K 019632 21 K od 23.12.2021. godine u periodu od 22.02.2022. godine do 14.11.2022. godine.

Istom presudom, a na osnovu člana 238. stav 4. i člana 78. stav 1. KZ FBiH, od optuženog M.G. oduzeti su predmeti decidno navedeni u izreci prvostepene presude, a na osnovu člana 202. stav 4. Zakona o krivičnom postupku Federacije Bosne i Hercegovine (ZKP FBiH), optuženi je oslobođen plaćanja troškova krivičnog postupka iz člana 199. stav 2. ZKP FBiH, tako da isti padaju na teret budžetskih sredstava.

Protiv te presude žalbu je izjavio branitelj optuženog M.G., advokat Beganović Adnan, zbog bitnih povreda odredaba krivičnog postupka, s tim da iz sadržine žalbe proizilazi da se njome ukazuje na povredu krivičnog zakona, sa prijedlogom da se žalba uvaži i pobijana presuda preinači tako da se optuženom u izrečenu kaznu zatvora uračuna vrijeme provedeno na uvjetnom otpustu, ili da se ta presuda ukine i predmet vrati prvostepenom sudu na ponovno odlučivanje.

Federalna tužiteljica je podneskom broj T07 0 KTŽ 0028676 23 3 od 30.06.2023. godine predložila da se žalba branitelja optuženog odbije kao neosnovana.

Na sjednici vijeća ovog suda koja je održana u odsutnosti uredno obaviještenog optuženog M.G. u smislu člana 319. stav 3. ZKP FBiH, federalna tužiteljica je ostala kod navoda i prijedloga iz pomenutog pismenog podneska, a branitelj optuženog je izjavio da u cijelosti ostaje kod osnova, razloga i prijedloga iz svoje žalbe, koju je ukratko i obrazložio.

Ispitujući pobijanu presudu u smislu člana 321. ZKP FBiH, i po službenoj dužnosti da li je na štetu optuženog povrijeđen Krivični zakon, ovaj sud je odlučio kao u izreci iz sljedećih razloga:

Branitelj optuženog žalbom osporava prvostepenu presudu u dijelu u kojem je odlučeno o uračunavanju pritvora i dijela izdržane kazne, navodeći da je optuženom tokom izdržavanja kazne po presudi Kantonalnog suda u Mostaru broj 07 0 K 019632 21 K od 23.12.2021. godine, odobren uvjetni otpust rješenjem Komisije za uvjetni otpust Federalnog ministarstva pravde (koje je uložio u spis), u periodu od 14.11.2022. godine do 14.02.2023. godine, a da mu taj period (proveden na uvjetnom otpustu), prvostepeni sud nije uračunao u kaznu zatvora izrečenu pobijanom presudom. S tim u vezi se poziva na Zakon o izvršenju krivičnih sankcija u FBiH (ZIKS), navodeći da taj zakon propisuje mogućnost otpuštanja zatvorenika sa izdržavanja kazne zatvora prije njenog isteka pod uvjetima koje propisuje KZ FBiH, a u kojem vremenu se osuđena osoba tretira kao da

izdržava efektivnu kaznu zatvora uz određene uvjete, pa da je slijedom toga, prvostepeni sud u izrečenu kaznu zatvora optuženom, trebao uračunati i vrijeme provedeno na uvjetnom otpustu. Iako se to u žalbi izričito ne navodi, slijedi da ovim žalbenim navodima branitelj suštinski ukazuje na povredu odredbe člana 57. stav 1. KZ FBiH.

Razmatrajući navedene žalbene prigovore, ovaj sud je utvrdio sljedeće:

Iz stanja spisa slijedi da je ovaj sud rješenjem broj 07 0 K 019632 22 Kž 5 od 18.01.2023. godine, djelimičnim uvažavanjem žalbe branitelja optuženog Filipović Ivana, a povodom te žalbe, po službenoj dužnosti, na osnovu člana 324. ZKP FBiH ukinuo presudu Kantonalnog/Županijskog suda u Mostaru broj 07 0 K 019632 21 K od 23.12.2021. godine i u odnosu na optužene K.I. i M.G., predmet vratio prvostepenom sudu na ponovno odlučivanje. Dakle, iako optuženi M.G. nije izjavio žalbu protiv navedene presude, ista je ukinuta i u odnosu na njega primjenom principa *beneficium cohaesionis*, slijedom čega nije mogla postati pravomoćna, nego je predmet vraćen na ponovno odlučivanje prvostepenom sudu, koji sud je to rješenje uz cio spis predmeta zaprimio dana 03.02.2023. godine.

Nadalje, iz dopisa Kazneno popravnog zavoda poluotvorenog tipa Mostar (KZP Mostar) broj 03-1-09-400/22 od 23.02.2022. godine, proizilazi da se optuženi M.G. dana 22.02.2022. godine u 19,50 sati, sam javio na izdržavanje kazne zatvora po presudi Kantonalnog/Županijskog suda u Mostaru broj 07 0 K 019632 21 K od 23.12.2021. godine, a da je rješenjem Općinskog suda u Mostaru broj 58 0 K 256071 22 Iks 3 od 06.02.2023. godine, obustavljen postupak izvršenja krivične sankcije prema M.G.u, obzirom da je taj sud, posredstvom Kantonalnog/Županijskog suda u Mostaru, zaprimio rješenje ovog suda broj 07 0 K 019632 22 Kž 5 od 18.01.2023. godine (a kojim je, kako je prethodno pojašnjeno, ukinuta prvostepena presuda po kojoj se optuženi M.G. javio na izdržavanje kazne zatvora). Pored toga, KPZ Mostar je dopisom broj 03-01-09-2467/22 od 14.11.2022. godine, obavijestio Općinski sud u Mostaru da je M.G. uvjetno otpušten sa izdržavanja ove kazne zatvora dana 14.11.2022. godine, a u skladu sa rješenjem Federalnog ministarstva pravde Sarajevo, Komisija za uvjetni otpust broj 01-12-5-2/22-275 od 30.08.2022. godine za period od tri mjeseca (od 14.11.2022. godine do 14.02.2023. godine), te je Općinski sud u Mostaru, dopisom broj 58 0 K 256071 22 Iks 3 od 12.12.2022. godine, o navedenoj činjenici obavijestio Kantonalni/Županijski sud u Mostaru.

Pobijanom presudom je prvostepeni sud, a kako je i prethodno navedeno, optuženom M.G.u izrekao kaznu zatvora u trajanju od 1 (jedne) godine i 6 (šest) mjeseci, u koju mu je, na osnovu člana 57. stav 1. KZ FBiH, uračunato vrijeme provedeno u pritvoru u periodu od 15.06.2021. godine do 23.12.2021. godine i vrijeme provedeno na izdržavanju kazne zatvora po presudi Kantonalnog/Županijskog suda u Mostaru broj 07 0 K 019632 21 K od 23.12.2021. godine u periodu od 22.02.2022. godine do 14.11.2022. godine.

Odredbom člana 57. stav 1. KZ FBiH propisano je da se vrijeme provedeno u pritvoru i svako lišenje slobode u vezi sa krivičnim djelom, uračunavaju u izrečenu kaznu zatvora, kaznu dugotrajnog zatvora, kaznu maloljetničkog zatvora ili novčanu kaznu.

Nadalje, odredbom člana 45. stav 1. je propisano da osuđeni koji je izdržao polovinu, a izuzetno i osuđeni koji je izdržao trećinu kazne zatvora, može biti oslobođen izdržavanja kazne zatvora pod uvjetom da ne učini novo krivično djelo prije isteka trajanja kazne, dok se odredba člana 46. stav 1. KZ FBiH odnosi na opoziv uvjetnog otpusta u situaciji kada osuđeni za vrijeme uvjetnog otpusta učini jedno ili više krivičnih djela za koja mu je izrečena kazna zatvora preko jedne godine ili teža kazna.

Odredbom člana 46. stav 3. KZ FBiH je propisano, između ostalog, da kod izricanja opoziva uvjetnog otpusta, dio kazne koji je osuđeni izdržao prema ranijoj presudi uračunava se u izdržavanje naknadne kazne, ali se vrijeme provedeno na uvjetnom otpustu ne uračunava. Iz toga slijedi da, primjenom tumačenja *argumentum a contrario*, ukoliko nije došlo do opoziva uvjetnog otpusta, onda se vrijeme provedeno na uvjetnom otpustu ima uračunati u izdržavanje naknadne kazne.

U konkretnoj procesnoj situaciji, optuženom je u kaznu zatvora izrečenu pobijanom presudom u trajanju od 1 (jedne) godine i 6 (šest) mjeseci, uračunato vrijeme provedeno u pritvoru (u periodu od 15.06.2021. godine do 23.12.2021. godine) i vrijeme provedeno na izdržavanju kazne zatvora po presudi Kantonalnog/Županijskog suda u Mostaru broj 07 0 K 019632 21 K od 23.12.2021. godine (u periodu od 22.02.2022. godine do 14.11.2022. godine), ali mu nije uračunato vrijeme provedeno na uvjetnom otpustu na osnovu rješenja Federalnog ministarstva pravde Sarajevo, Komisija za uvjetni otpust broj 01-12-5-2/22-275 od 30.08.2022. godine, čime je, i po ocjeni ovog suda, povrijeđena odredba člana 57. stav 1. KZ FBiH, u vezi sa odredbama čl. 45. stav 1. i 46. stav 3. istog zakona.

Slijedom toga je ovaj sud temeljem člana 329. ZKP FBiH preinačio pobijanu presudu u odluci o uračunavanju pritvora i ranije kazne, tako da je optuženom u kaznu zatvora izrečenu tom presudom, na osnovu člana 57. stav 1. KZ FBiH uračunao vrijeme provedeno u pritvoru u periodu od 15.06.2021. godine do 23.12.2021. godine, vrijeme provedeno na izdržavanju kazne zatvora po presudi Kantonalnog/Županijskog suda u Mostaru broj 07 0 K 019632 21 K od 23.12.2021. godine u periodu od 22.02.2022. godine do 14.11.2022. godine i vrijeme provedeno na uvjetnom otpustu po rješenju Federalnog ministarstva pravde Sarajevo, Komisija za uvjetni otpust broj 01-12-5-2/22-275 od 30.08.2022. godine.

Pri tome, kako prvostepeni sud nije utvrdio vrijeme koje je optuženi proveo na uvjetnom otpustu po navedenom rješenju Federalnog ministarstva pravde, slijedi da se ni izrekom ove presude to vrijeme nije moglo odrediti, pa će prvostepeni sud u tom pravcu, primjenom odredbe člana 196. stav 1. ZKP FBiH, donijeti posebno rješenje.

Zapisničarka
Šeta Mevlida,s.r.

Predsjednica vijeća
Begić Jasmina,s.r.